



USAID
FROM THE AMERICAN PEOPLE



ქალებისა და ახალგაზრდების საჭიროებების შეფასება
ადრეული გაფრთხილების
გენდერზე ორიენტირებული სისტემის (GREWS) მიხედვით

ქუთაისის მუნიციპალიტეტი

პროექტი 72011421CA00001

*„განხეთქილების დაძლევა - ხალხთაშორისი ინიციატივები
კონფლიქტის მოსაგვარებლად“*

2021 წელი, აპრილი

კვლევის ჩატარება შესაძლებელი გახდა
ამერიკელი ხალხის გულისხმიერი მხარდაჭერით
USAID-ის სააგენტოს მეშვეობით

*კვლევაში გამოთქმული მოსაზრებები ეკუთვნის ფონდ „სოხუმს“
და, შესაძლოა, არ გამოხატავდეს USAID-ის პოზიციას*

სარჩევი

შესავალი-----	3
კვლევის მიზანი და მეთოდოლოგია-----	4
I ბლოკი: დემოგრაფიული მონაცემები-----	4
II ბლოკი: ეკონომიკური უსაფრთხოება-----	5
III ბლოკი: სასურსათო უსაფრთხოება-----	9
IV ბლოკი: საზოგადოებრივი უსაფრთხოება-----	9
V ბლოკი: ჯანმრთელობის უსაფრთხოება-----	12
VI ბლოკი: პირადი უსაფრთხოება -----	13
VII ბლოკი: ეკოლოგიური უსაფრთხოება-----	16
VIII ბლოკი: ზოგადი კითხვები -----	17
რეკომენდაციები-----	21

შესავალი


კონფლიქტების ადრეული გაფრთხილების გენდერზე ორიენტირებული სისტემა (GREWS) გულისხმობს საზოგადოებაში არსებული საჭიროებების შესწავლას და მოსალოდნელ რისკებზე ადრეული რეაგირების სისტემის შექმნას. აღნიშნული (GREWS) სისტემის დანერგვა გენდერზე ორიენტირებული მიდგომით მნიშვნელოვნად ამცირებს ძალადობისა და კონფლიქტების განვითარების რისკს საზოგადოებაში, ხელს უწყობს დემოკრატიული პრინციპების დამკვიდრებას. ქვეყნის არამდგრადი პოლიტიკური გარემო, დაბალი სოციალურ-ეკონომიკური მაჩვენებელი, სამუშაო ადგილის და შემოსავლების დაკარგვის შიში, გარემოს დაბინძურება, ჯანმრთელობის დაცვის არასტაბილური გარანტიები, ძალადობის გაზრდილი მაჩვენებელი და სხვა სახის საფრთხეები ზღუდავს ადამიანის არჩევანის თავისუფლებას, აფერხებს სრულფასოვანი ცხოვრების შესაძლებლობას და მნიშვნელოვნად ზრდის ძალადობისა და კონფლიქტის განვითარების რისკს საზოგადოებაში. აღნიშნული რისკების გასაწეიტრალეზად მნიშვნელოვანია ადრეული ჩარევა და რეაგირება. გენდერზე ორიენტირებული ადრეული გაფრთხილების სისტემა (GREWS) მნიშვნელოვანი ინსტრუმენტია საზოგადოებაში არსებულ პრობლემებზე ადრეული რეაგირების, ადამიანური უსაფრთხოების ხარისხის გაუმჯობესების თვალსაზრისით. კონფლიქტის მოსალოდნელი რისკების განსაზღვრა უნდა ეფუძნებოდეს მოსახლეობის საჭიროებების შესწავლას გენდერული მიდგომით, რომლის შეფასებაც და ადრეული გაფრთხილების სისტემაში მოქცევა შექმნის მდგრადი მშვიდობისა და სტაბილურობის განცდას საზოგადოებაში. ფონდი „სოხუმის“ მიერ ჩატარებული კვლევა „ქალებისა და ახალგაზრდების საჭიროებების შეფასება კონფლიქტების ადრეული გაფრთხილების გენდერზე ორიენტირებული სისტემის (GREWS) მიხედვით“ ხელს შეუწყობს ქალებისა და ახალგაზრდების პრიორიტეტული პრობლემების წარმოჩენას და შესაბამისი ადრეული რეაგირების (GREWS) მექანიზმის შექმნას ადგილობრივ დონეზე.

კვლევის მიზანი და მეთოდოლოგია

მოქალაქეთა საჭიროებების კვლევაში მონაწილეობა მიიღო ქუთაისის მუნიციპალიტეტში მცხოვრებმა 18 წლიდან 65 წელს ზევით ასაკის ქალებმა, მათ შორის იყვნენ - დევნილი, ადგილობრივი, სოციალურად დაუცველი პირები, მრავალშვილიანი და მარტოხელა დედები, შშმ პირები, ახალგაზრდები, პენსიონერები, სასკოლო და სკოლამდელი აღზრდის დაწესებულებების პედაგოგები; ადგილობრივი ექსპერტები თვითმმართველობის საკითხებში. რაოდენობრივი კვლევა ითვალისწინებდა 150 ქალის გამოკითხვას, თუმცა კვლევაში ჩართული იყო 217 ქალი. თვისებრივი კვლევისთვის ჩატარდა 4 სიღრმისეული ინტერვიუ ადგილობრივ ექსპერტებთან (3 კაცი და 2 ქალი) და 4 ფოკუს-ჯგუფის დისკუსია ადგილობრივ ქალებთან (სულ 24 ქალი) თვისებრივი კვლევის სამიზნე ჯგუფები იყვნენ მარტოხელა და მრავალშვილიანი, სოციალურად დაუცველი ქალები, ჟურნალისტები, პედაგოგები, ფარმაცევტი, არასამთავრობო და საბიუჯეტო ორგანიზაციების წარმომადგენლები, შშმ პირები ან მათი ოჯახის წევრები, იძულებით გადაადგილებული პირები.

I ბლოკი: კვლევის სოციალურ-დემოგრაფიული მახასიათებლები


სოციალური სტატუსის მიხედვით - რაოდენობრივი კვლევის რესპონდენტთა შორის იყო 182 ადგილობრივი ქალი (83,87%) და განსაკუთრებული სტატუსის მქონე მოქალაქეები: დევნილი - 24 (11,05%), სოციალურად დაუცველი 2 – (0,92%), მრავალშვილიანი დედა - 4 (1,84%), მარტოხელა დედა - 11 (5,06%), შშმ პირი - 1 (0,46%). (დიაგრამა 1)



საქმიანობის მიხედვით რაოდენობრივი კვლევის რესპონდენტთა მონაცემების ანალიზით ჩანს:

სახელმწიფოს მიერ დასაქმებულია - 63 (29,03%) რესპონდენტი, კერძო ბიზნესში დასაქმებული (ინდემწარმე, თვითდასაქმებული) - 30 (13,87%), კერძო/სამოქალაქო საზოგადოების სექტორში დაქირავებულია - 20 (9,21%) გამოკითხული, სასოფლო-სამეურნეო სფეროში საქმიანობს - 4 (1,84%), სტუდენტია - 63 (29,03%) გამოკითხულ და უმუშევარია - 31 (14,28%). უმუშევარ რესპონდენტთა შორის მაჩვენებელი კი ასეთია: დევნილი - 3 (1,38%), ადგილობრივი - 25 (11,52%), მარტოხელა დედა - 1 (0,46%). (დიაგრამა 2)


საქმიანობის ტიპი



II ბლოკი: ეკონომიკური უსაფრთხოება

აღნიშნული ბლოკის მონაცემების ანალიზიდან ჩანს თუ რა შემოსავლებით სარგებლობენ ქალები. ქუთაისის მუნიციპალიტეტის მოსახლეობის უმეტესობისთვის ოჯახების შემოსავლის ძირითად წყაროს წარმოადგენს სახელფასო ანაზღაურება - 137 რესპონდენტს (63,13%), მათ შორისაა: 14 დევნილი (10,21%), 118 ადგილობრივი (86, 13%), 7 მარტოხელა დედა (5, 10%), 3 მრავალშვილიანი დედა (2,18%). ოჯახის შემოსავლის ძირითად წყაროდ პენსია მიაჩნია 46 რესპონდენტს (21,19%). სახელმწიფო დახმარება გამოკითხულ სოციალურ ჯგუფებზე შემდეგნაირად განაწილდა: სოციალურად დაუცველი ოჯახის შემწეობა - 3-ს (1,38%), დევნილის შემწეობა - 15-ს (6, 91%), საოჯახო მეურნეობიდან მიღებული შემოსავალი აქვს 17 ადამიანს (7,83%), მცირე ბიზნესიდან მიღებული შემოსავლით სარგებლობს - 25-ს (11,52%), საზღვარგარეთიდან გზავნილზე დამოკიდებულია - 48-ს (22,11%) და ახლობლების დახმარებით ცხოვრობს 11 რესპონდენტი (5,06%). (დიაგრამა 3).


შემოსავლის ძირითადი წყარო



ეკონომიკური უსაფრთხოების ბლოკში განსაკუთრებით მნიშვნელოვანი იყო ქალების ეკონომიკური გაძლიერებისთვის შემაფერხებელი ფაქტორების განსაზღვრა.

ანალიზისას ყველაზე მნიშვნელოვნად დასაქმების ნაკლები პერსპექტივა დასახელდა, რაც გამოკითხულთა 143 (65, 89%)–მა აღნიშნა. 141 (64,97%) რესპონდენტმა აღნიშნა დაბალი ფინანსური შემოსავალი, იძულებითი მიგრაცია საზღვარგარეთის ქვეყნებში - 70 (32,25%)–მა დააფიქსირა, ინფლაცია და მაღალი ფასები საკვებ პროდუქტებზე, მედიკამენტებზე, საყოფაცხოვრებო ნივთებზე - 76 (35,02%)–მა აღნიშნა, ადგილობრივი და ცენტრალური სახელმწიფო პროგრამების სიმცირე/არაეფექტურობა მცირე ბიზნესის, მეწარმეობის განვითარებისათვის შემაფერხებელი ფაქტორია- 52 (23,96%)–სთვის, მაღალპროცენტიანი სესხები და კრედიტები აფერხებს- 40 (18,43%), კოვიდ-19-ის შედეგად შეწყვეტილი ბიზნეს საქმიანობის აღდგენაში ხელშეწყობა - 35 (16,12%) გამოკითხულის აზრია.

რაოდენობრივი კვლევისას გამოიკვეთა, რომ დასაქმებული ქალების ეკონომიკური გაძლიერებისათვის შემაფერხებელი ფაქტორია მხარდაჭერის უფასო სერვისების არარსებობა (იგულისხმება ბავშვის მოვლის/ზრუნვის გახანგრძლივებული სერვისები სკოლებსა და ბაღებში, მარტოხელა დედებისთვის, მრავალშვილიანი ოჯახებისთვის). ეს ხელს უშლის ქალებს, აქტიურად ჩაერთონ ეკონომიკურ საქმიანობაში - 48 (22,11%). ამ რაოდენობაში მოიაზრება: 2 დევნილი (4,16%), 43 ადგილობრივი (89, 58%), 1 მრავალშვილიანი დედა (2, 08%) და 2 მარტოხელა დედა (4, 16%).
(დიაგრამა 4)




ფოკუს-ჯგუფებზე დაადასტურეს ყველა ეს მიზეზი, თუმცა გამოითქვა ასეთი მოსაზრებაც:

ი.ჩ., ქალი, დასაქმებული: პრიორიტეტულია ქალთა დასაქმება. ჩემს ქუჩაზე პატარა სამკერვალოა. მეპატრონე ქალი მეუბნებოდა: ვის არ შევთავაზებ, უფასოდ შეგასწავლი ჭრა-კერვას, მაგრამ არავინ მოდისო.

კითხვაზე, თუ რომელ **სოციალურ-ეკონომიკური გაძლიერების სახელმწიფო პროგრამებზე ფლობენ ინფორმაციას გამოკითხული ბენეფიციარები**, გაირკვა, რომ ქუთაისის მუნიციპალიტეტში ყველაზე მეტ ინფორმაციას ფლობენ პროგრამაზე „აწარმოე საქართველოში“ – 133 (61, 29%), მათ შორისაა 17 დევნილი - (12,78%) და 108 ადგილობრივი (81, 20%) რესპონდენტი. ხოლო როგორცაა - დევნილთა საარსებო წყაროებით უზრუნველყოფის პროგრამა - ინფორმირებულია -34 (15,66%), დანერგე მომავლის პროგრამის შესახებ იცის - 34 (15,66%)–მა, საერთაშორისო/ადგილობრივი არასამთავრობო ორგანიზაციების პროგრამები ცნობილია - 42 (19,35%)–სთვის, სხვადასხვა პროფესიული განვითარების/გადამზადების პროგრამაზე ინფორმაციას ფლობს - 70 32,25%) და კვლევისას აღმოჩნდა, რომ 54 ქალს (24,88%), საერთოდ არ გააჩნია ინფორმაცია.**(იხ. დიაგრამა 5)**

სოციალურ-ეკონომიკური გაძლიერების სახელმწიფო პროგრამები



ეკონომიკური მდგომარეობის გასაუმჯობესებლად მნიშვნელოვანია **საოჯახო მეურნეობის, მცირე მეწარმეობისა და თვითდასაქმებისათვის ხელსაყრელი გარემო პირობების შექმნა**. ყველაზე მეტი პასუხი - 124 (57, 14%) დააგროვა მცირე ბიზნესის ხელშეწყობის პროგრამების საჭიროებამ. ამ რაოდენობაში დევნილი რესპონდენტია 17 (13,70%), ადგილობრივი კი - 99 (79, 83%). დანარჩენი პასუხების კუთხით გაირკვა შემდეგი: ხელმისაწვდომ კრედიტებს აღნიშნავს - 107 (49, 30%) რესპონდენტი, საგრანტო პროგრამებზე საუბრობს - 84 (38, 70%), სოფლის მხარდაჭერის პროგრამები აინტერესებს - 91 (41, 93%) გამოკითხულს, ადგილობრივი თვითმმართველობის პროგრამები სოფლის მეურნეობის, სასათბურე და სხვა ტიპის საქმიანობების მხარდასაჭერად - 58 (26,72%) ქალს, მოსახლეობის მეტი ინფორმირება არსებულ სახელმწიფო პროგრამებზე - 102 (47,00%)-ს, საკონსულტაციო სერვისები და დახმარება ბიზნეს პროექტების წერაში კი - 37 (17, 05%) გამოკითხულსი პასუხია.

ამ კითხვაზე ფოკუს-ჯგუფებზეც გაკეთდა აქცენტი. რამდენიმე ამონარიდი:

ლ.ჩ., ქალი, დასაქმებული: პროფესიული გადამზადების შემდეგ ბევრს საჭირო ინვენტარი არა აქვს. მათ სჭირდებათ დახმარება.

ყურადღება გამახვილდა დედების ხელშეწყობაზეც:

დ.ს. ქალი, ეთნიკური უმცირესობის წარმომადგენელი: მყავს სამი შვილი, ვარ მარტოხელა დედა, უნდა იყოს უსაფრთხო პროგრამა, რომ დედა მშვიდად წავიდეს სამსახურში.

ი.შ. კაცი, საკრებულოს წარმომადგენელი: მნიშვნელოვანია ქალთა ეკონომიკური საქმიანობის ხელშეწყობა ადგილობრივი თვითმმართველობის ჩართულობა ტრენინგების, ბიზნესგეგმის შემუშავების მიმართულებით. ასევე ახალგაზრდების ინიციატივების მხარდაჭერა...

გამოკითხვიდან ჩანს, რომ აღნიშნულ პროგრამებზე მოსახლეობის 139 (64, 05%) ინფორმაციას იღებს ონლაინ მედიასაშუალებების და სოციალური ქსელების დახმარებით, ტელევიზია და რადიო - 109 (50, 23%) რესპონდენტისთვისაა ინფორმაციის წყარო, ინფორმაციის მიღება მეზობლებისა და ნაცნობებისგან დააფიქსირა 68-(31,33%) გამოკითხულმა, 53 (24,42%) **ინფორმაციას იღებს** მუნიციპალიტეტის ვებგვერდი/ფეისბუქგვერდიდან, ცენტრალური ხელისუფლების/სამინისტროს ვებგვერდი/ფეისბუქგვერდიდან ინფორმაციას იღებს - 33 (15,20%), არასამთავრობო ორგანიზაციებიდან -25 (11,52%), საინფორმაციო ფურცლები/საინფორმაციო დაფების საშუალებით თემში - 18 (8, 29%) გამოკითხული, ინფორმაციის გავრცელების კუთხით, ყველაზე ნაკლები მაჩვენებელი დაფიქსირდა მერის წარმომადგენლის თემში - 7 (3,22%) და ადგილობრივი დეპუტატის - 6 (2,76%) მიერ.

თვისებრივი კვლევის დროსაც გამოვლინდა ინფორმაციის წყაროების შესახებ სხვადასხვა მოსაზრებები:

თ.გ. ქალი, მარტოხელა დედა, სოციალურად დაუცველი: წელიწადში ერთხელ კეთდება 200-ლარიანი დახმარება მუნიციპალიტეტიდან... შარშან აპრილში დავწერე და წელს მივიღე 240 ლარი.

ნ.ჟ., ქალი, დასაქმებული არასამთავრობო ორგანიზაციაში: ორი წლის მანძილზე გვექონდა პროექტი „ჯანმრთელი დედები - ჯანმრთელი მომავალი“, მუნიციპალურ და სახელმწიფო პროგრამების ვაცნობდით საბავშვო ბაღებში - მშობლებს და პედაგოგებს.

ე. ქ., ქალი სოც დაუცველი, მრავალშვილიანი დედა: ინფორმაციის წყაროა მეზობლები.

მ.ც., 65 წ., ქალი, შშმ პირი: მოსახლეობას ადგილობრივი ხელისუფლების წარმომადგენლები არ აცნობენ თავიანთ გეგმებს. მათ ელექტრონულ გვერდზე თავმოსაწონებელი ღონისძიებებია ასახული. ბევრისთვის ესეც არაა ხელმისაწვდომი, რადგან არც კომპიუტერი აქვს და არც ინტერნეტი.

ლ.ხ. 56 წ., ქალი, დასაქმებული: ბიუჯეტის დაგეგმვისას მოდის მუნიციპალიტეტის წარმომადგენელი და გვეკითხება, რა გვჭირდება. მიაქვს მერიამდე წინადადებები. ეს ხდება წელიწადში ერთხელ.

თვითმმართველობის წარმომადგენლების მოსაზრება კი ასეთია:

ი.შ., კაცი, საკრებულოს წარმომადგენელი: მოსახლეობისთვის პრიორიტეტულია ინფრასტრუქტურის გაუმჯობესება, სოციალური და ჯანდაცვითი პროგრამები, საბინაო ინფრასტრუქტურის გაუმჯობესება, ტურიზმის განვითარების ხელშეწყობა. მოწყვლადი ჯგუფების სპეციფიკური საჭიროებების გამოსავლენად გვაქვს მჭიდრო თანამშრომლობა მოწყვლადი ჯგუფების საკითხებზე მომუშავე არასამთავრობო ორგანიზაციებთან. თანამშრომლობის საფუძველზე მომზადდა შშმ ქალების და გოგონებისთვის მუნიციპალურ პოლიკლინიკაში გინეკოლოგიური კაბინეტის ადაპტირების პროგრამა, ვმუშაობთ გაჩერებების ადაპტირებაზე. ვთანამშრომლობთ აუტისტური სპექტრის ბავშვების მშობლებთან და იხვეწება დაფინანსებული თერაპიის პროგრამა. ადგილობრივი თვითმმართველობისთვის ინფორმაციის წყაროა - კვლევები, შეხვედრებზე მიღებული უკუკავშირი და დარგობრივ ორგანიზაციებთან თანამშრომლობა.

მ.ხ., კაცი, ადგილობრივი ექსპერტი ინფრასტრუქტურის საკითხებში: მერის წარმომადგენლები სრულყოფილად ფლობენ ინფორმაციას მოსახლეობის პრობლემებზე.

საჭირო ინფორმაციის მიღებაში ხელისშემშლელ ფაქტორად გამოკითხულ რესპონდენტთა 175 (80,64%), მათ შორის: დევნილი - 17 (9,71%), ადგილობრივი - 148 (84,57%). აღნიშნავს არასაკმარის კომუნიკაციას და მოსახლეობის ინფორმირებას სახელმწიფო უწყებების წარმომადგენლებისგან. მოსახლეობის 32 (14,74%) -მა აღნიშნა დაბალი ინტერესი ეკონომიკური გაძლიერებისკენ მიმართულ სახელმწიფო და ადგილობრივ პროგრამებზე ხელისშემშლელ ფაქტორად. მათ შორის: დევნილი - 6 (18,75%), ადგილობრივი - 25 (78,12%). გამოკითხულთაგან ინტერნეტის არქონის პრობლემა დააასახელა 4-მა ადამიანმა. ყველა მათგანი ადგილობრივია (1,84%).

თვისებრივმა კვლევამ დაადასტურა ნაკლები კომუნიკაციის პრობლემა:

ნ.ჩ., 45 წ., ქალი, მოფარიკავე, ა/ო „სრულფასოვანი ოჯახისთვის“ წევრი, შშმ პირი: შშმ პირების სხვადასხვა პრობლემის მოსაგვარებლად აუცილებელია ხშირი კომუნიკაცია.

ნ. დ., 35 წ., ქალი, დიასახლისი, მრავალშვილიანი დედა: არ არის კომუნიკაცია მოსახლეობასთან. ისევე მრავალშვილიანი დედები ვაგებინებთ ერთმანეთს. ბევრმა არც იცის რას იძლევა მერია. სამშობიაროში უნდა მიაწოდონ ინფორმაცია - მაგ., მეოთხე შვილზე რა სახის დახმარებაა.

მ.ც., 65 წ., ქალი, შშმ პირი: არცერთ ხელისუფლებას არ აინტერესებს მოსახლეობასთან კომუნიკაცია. შეურაცხყოფილი დავრჩი. სოცაგენტმა დახმარების ნაცვლად, დამმოდღრა, გამეყო ბინა, ნაკლებფართიანი შემეძინა და დარჩენილი თანხით თავი მერჩინა. უკვე ცენტრში მამაპაპისეული სახლი გაყიდული მქონდა და ქალაქის ბოლოს გადმოვედი.

მ.ქ., 67 წ., ქალი: ადგილობრივი თვითმმართველობა თავად უნდა იყოს დაინტერესებული, რომ მისი პროგრამა იყოს საჯარო. ელექტრონული ვერსიების მოძიება ყველას არ შეუძლია ადგილობრივი პროგრამების შესახებ ინფორმაციის მოსახლეობამდე მიტანა მოსაგვარებელია.

ნ. ჩ., 45 წ., ქალი, დასაქმებული არასამთავრობო ორგანიზაციაში, შშმ პირი: მობილური ჯგუფის გამოყოფა გვჭირდება. ჩვენ გავაკეთებთ შეკრებებს, ოღონდ გამოგვიყონ მობილური ჯგუფი, გადაადგილებაში დაგვეხმარონ.

ნ.დ., დიასახლისი, მრავალშვილიანი დედა: ოთხი შვილი რომ შემეძინა, ხუთი წლის შემდეგ გავიგე - მერიის ტრანსპორტი მრავალშვილიანებისთვის უფასო რომ იყო. მე არ შემძლია ვიარო და სტენდებზე ვეძებო სიახლეები! მრავალშვილიანებს უნდა გაუმზადონ და მოაწოდონ ინფორმაცია.

ი.ს., 47 წ., ქალი, დასაქმებული, დევნილის ოჯახის წევრი: კომპიუტერის არქონა დიდი პრობლემაა მრავალშვილიანი ოჯახებისათვის.

ნ.დ., 53 წ., დასაქმებული: დისტანციურ სწავლებაზე გადასვლისას პროგრამებში ბევრ ბავშვს უნდოდა ჩართვა, მაგრამ ხუთ, ექვს, შვიდ შვილიან ოჯახში იყო ერთი მობილური. რამდენიმე ოჯახი დააკმაყოფილეს, მაგრამ პრობლემა მაინც დარჩა.

III ბლოკი: სასურსათო უსაფრთხოება

ადამიანური უსაფრთხოების კომპონენტებს შორის ერთ-ერთი მნიშვნელოვანია სასურსათო უსაფრთხოება. გამოკითხვაშიც ნათლად გამოჩნდა, რომ ეს საკითხი ძალიან აღელვებს ქალებს.

გამოკითხულთა უმრავლესობა - 183 (84,33%) პროდუქტების მაღალ ფასზე მიუთითებს. მათ შორის: დევნილი - 22 (12,02%), ადგილობრივი - 151 (82,51%). ხარისხიანი პროდუქტების არარსებობაზე ამახვილებს ყურადღებას 169 (77,88%) რესპონდენტი, მათ შორის: დევნილი - 17 (10,05%), ადგილობრივი - 143 (84,61%), ხოლო სიახლოვეს პროდუქტების მაღაზიის არარსებობას უჩივის 11 ქალი (5,06%, მათ შორის დევნილი - 1 (9,09%), ადგილობრივი - 10 (90,90%).

ფოკუს-ჯგუფებზე ამ კითხვასთან დაკავშირებით საგულისხმო პასუხები გამოითქვა:


ნ.ხ., 50 წ., ქალი, დასაქმებული: იზრდება ფასები სურსათზე, ეს აისახება ნებისმიერ ოჯახზე.

ი.ს., 30 წ., მრავალშვილიანი, დევნილის ოჯახის წევრი, სოციალურად დაუცველი: ოცი ლარით ახლა პური და ზეთია.

IV ბლოკი: საზოგადოებრივი უსაფრთხოება

რაოდენობრივ კვლევაში ჩართული ქალებიდან საზოგადოებრივი უსაფრთხოებისთვის ყველაზე აქტუალურად სახელდება სამი საკითხი, რომლებზეც პასუხები ასე გადანაწილდა: ტრანსპორტის მომსახურების გაუმჯობესება - 87 (40,09%), შიდა გზების მოწესრიგება - 76 (35,02%), წყლის გაყვანილობის სისტემის და სასმელი წყლის მიწოდების ხარისხის გაუმჯობესება - 57 (26,26%), რაც შეეხება დანარჩენ მჩვენებლებს ასეთია: -სანიაღვრე არხების გაკეთება - 56 (25,80%), ფეხით მოსიარულეთათვის ბარდიურების, ტროტუარების მოწესრიგება - 56 (25,80%) სოფელში შემომავალი ცენტრალური გზის მოწესრიგება - 52 (23,96%), საკანალიზაციო სისტემის გამართვა - 52 (23,96%), ბავშვის მოვლის მხარდაჭერის სერვისები (სკოლის და ბაღის შემდგომი) დასაქმებული დედებისთვის - 47 (21,65%). სკოლაში არსებული არადამაკმაყოფილებელი ინფრასტრუქტურული პრობლემები - 37 (17,05%), სკოლისგარეშე წრეები ბავშვებისთვის - 37 (17,05%), საყოფაცხოვრებო მომსახურების ობიექტები სოფელში (სალონი, სამკერვალო და ა.შ.) - 29 (13,36%), საბავშვო ბაღები - 26 (11,98%), გარე განათების გამართვა - 20 (9,21%) **(დიაგრამა 6)**

რომელი საკითხია თქვენთვის და თქვენს თემში მცხოვრები ქალებისთვის უფრო პრიორიტეტული და აქტუალური



თვისებრივ კვლევაში , პრიორიტეტულ საკითხებზე ბევრი რამ აღნიშნეს ფოკუს-ჯგუფებისა და ინტერვიუების რესპონდენტებმა.

ი.შ. კაცი, საკრებულოს წარმომადგენელი: აქტუალური პრობლემებია: უმუშევრობა, კვალიფიციური კადრების ნაკლებობა რეგიონში, შიდა და გარე მიგრაცია, ინფრასტრუქტურა, სოციალური და ჯანდაცვითი პროგრამები, ტურიზმის განვითარება.


კ.კ. კაცი, ადგილობრივი ექსპერტი ინფრასტრუქტურის საკითხებში: მოსახლეობის მთავარი პრობლემები არის: ნაგვის ურნების სიმცირე, რეკრეაციული ზონების და მარადმწვანე ხეების ნაკლებობა, სკვერების სიმცირე, ქალაქის ტერიტორიაზე საპირფარეშოების არარსებობა. ხდება სანაგვე ურნების შექმნა, მაგრამ აზიანებენ. ხდება სკვერების მოწყობაც. ამ ეტაპზე 5 სკვერის რეაბილიტაცია მიმდინარეობს. ინტენსიურად ხდება გზების დაგება. 2021 წლის ბოლოსთვის ქალაქში აღარ დარჩება პირველხარისხოვანი გზა, რომელსაც ექნება სანიაღვრის, გზის საფარის საფეხმავლო გზის ან საგზაო ნიშნების პრობლემა. სკოლების და ბაღების წინ მოწყობილია მწოლიარე პოლიციელები. ისინი უფრო უქმნიან პრობლემას მოძრაობას. მალე ქალაქში 200-მდე ახალი კამერა დამონტაჟდება და ყველა უფრო დაიცავს საგზაო წესებს.

მ.ც., 65 წ. ქალი, შშმ პირი: ქალების ეკონომიკური გაძლიერებისთვის ხელისშემშლელი სამუშაო ადგილების არქონაა, თუ სადმე იშოვიან სამსახურს, ანაზღაურება ძალიან დაბალია.

რაოდენობრივი კვლევის ანალიზიდან გამომდინარე, ქუთაისის მუნიციპალიტეტის მოსახლეობისთვის არანაკლებ მნიშვნელოვანი საფრთხეებია: კრიმინალის ზრდა - 155 (71,42%), მათ შორის: დევნილი - 20 (12,90%), ადგილობრივი - 129 (83,22%), ალკოჰოლიზმი და ნარკომანია - 90 (41,47%), მათ შორის: დევნილი - 8 (8,88%), ადგილობრივი - 77 (85,55%). გაუმართავი საგზაო მოძრაობა რომ საფრთხის შემცველია, აღნიშნ 54-მა (24,88%), 59 (27,18%) რესპონდენტი კი პრობლემად მიიჩნევს საქართველოში კონფლიქტების ესკალაციის საშიშროებას.

სხვა პრობლემების მონაცემები პასუხებში ასე ჩამოყალიბდა: მოუწესრიგებელი ინფრასტრუქტურა - 38 (17,51%), დისკრიმინაციის და შეუწყნარებლობის მაღალი დონე - 45 (20,73%), უმცირესობების, განსხვავებული პოლიტიკური შეხედულებების პირების საზოგადოებრივ ცხოვრებაში მონაწილეობის დაბალი ხარისხი - 26 (11,98%). (დიაგრამა 7)

რომელს მიიჩნევთ ყველაზე დიდ პრობლემას საზოგადოებრივი უსაფრთხოებისთვის



კვლევიდან მიღებული მონაცემებიდან ჩანს, თუ რა ადგილს იკავებს განათლების მიღებასთან დაკავშირებული პრობლემები. კითხვაზე, აქვთ თუ არა თქვენს შვილებს, შვილიშვილებს ან ნაცნობებს ხარისხიან საშუალო განათლებაზე წვდომა, უმეტესობამ - 85 რესპონდენტმა (39,17%) დადებითი პასუხი გასცა. პასუხი „არა“ დააფიქსირა 16-მა ქალმა (7,37%). მათ შორის: 5 დევნილია (31,25%) და 11 ადგილობრივი (68,75%). არცერთი არ არის სოციალურად დაუცველი, მარტოხელა ან მრავალშვილიანი დედა. ხარისხიან საშუალო განათლებაზე წვდომას ნაწილობრივ აფიქსირებს 116 ადამიანი (53,45%). მათ შორის: დევნილი - 10 (8,62%), ადგილობრივი - 97 (83,62%), სოციალურად დაუცველი - 2 (1,72%), მარტოხელა დედა - 9 (7,75%), მრავალშვილიანი დედა - 2 (1,72%).


რაოდენობრივი კვლევის საშუალებით გაირკვა თუ რა არის ამის მიზეზები: გამოკითხულთა 117 (53,91%) აღნიშნავს სწავლების დაბალი ხარისხს. არასაკმარისი პროფესიონალ პედაგოგზე ამხვილებს ყურადღებას - 74 (34,10%) რესპონდენტი, გაუმართავ სასკოლო ინფრასტრუქტურას (ამორტიზებული, სარემონტო შენობა, გაუმართავი საკანალიზაციო სისტემა, წყლის არარსებობა და ა.შ.) აღნიშნავს - 29 (13,36%), სკოლასა და სახლს შორის დიდ მანძილს ასახელებს - 18 (8,29%), სკოლაში შესაბამისი ტექნიკური აღჭურვილობის არარსებობა (კომპიუტერები, ინტერნეტი, სპეციალიზებული საგნობრივი კაბინეტები (ფიზიკა, ქიმია, ბიოლოგია და ა.შ.) აწუხებს - 49 (22,58%), ხოლო დაბალი ხარისხის ინტერნეტი (დისტანციური სასწავლო პროცესის უზრუნველსაყოფად) პრობლემად მიაჩნია - 40 (18,43%) გამოკითხულს.

ე.ფ., 60 წ., ქალი: აუცილებელია ნიჭიერი ბავშვების მხარდაჭერა, ვისაც აქვს უნიკალური მონაცემები ხელოვნებაში. ჰყავთ მშობლები, მაგრამ უჭირთ, ხელს ვერ უწყობენ.

ხელმისაწვდომია თუ არა უმაღლესი განათლების მიღება, გამოკითხვის შედეგად გამოჩნდა, რომ გამოკითხულთა 135 (62,21%), -ის ოჯახის წევრებისა და ნაცნობებისთვის უმაღლესი განათლება ხელმისაწვდომია. 9 (4,14%) თვლის, რომ არაა ხელმისაწვდომი, ხოლო 73 (33,64%) თვლის რომ ნაწილობრივ არის ამის საშუალება. რაც შეეხება მიზეზებს, უმაღლესი განათლების მისაღებად პრობლემად მიაჩნიათ ის, რომ: არ არსებობს სკოლებში პროფესიის საორიენტაციო კურსები, რაც აფერხებს აბიტურიენტს მისთვის საუკეთესო პროფესიის არჩევაში - 61 (28,11%), რეგიონიდან სტუდენტისთვის ქალაქში ხელმიუწვდომელია უფასო საცხოვრებელი - 27 (12,44%), სწავლების მაღალი საფასური მიზეზია - 85 (39,17%) გამოკითხულისთვის და სწავლების დაბალი ხარისხს აღნიშნავს - 44 (20,27%).

V ბლოკი: ჯანმრთელობის უსაფრთხოება

რაოდენობრივი კვლევის დროს გამოიკვეთა პრიორიტეტული და აქტუალური პრობლემები: გამოკითხული 38 (17,51%) ქალები თავიანთ ოჯახში ან თემში მიიჩნევენ -პირველადი ამბულატორიული სამედიცინო პუნქტის არარსებობას. მათ შორის: დევნილი - 3 (7,89%), ადგილობრივი - 34 (89,47%) ქალებისთვის, სამედიცინო პერსონალის სიმცირეს აღნიშნავს- 35 (16,12%), მათ შორის: დევნილი - 7 (20%), ადგილობრივი - 26 (74,28%), უხარისხო სამედიცინო მომსახურებაზე საუბრობს - 116 (53,45%), მათ შორის: დევნილი - 12 (10,34%), ადგილობრივი - 97 (83,62%), მაღალი ფასები მედიკამენტებზე აღნიშნა - 171 (78,80%), მათ შორის: დევნილი - 21 (12,28%), ადგილობრივი - 140 (81,87%), არაინფორმირებულობა ჯანდაცვის პროგრამებზე პრობლემად მიაჩნია - 55 (25,34%), მათ შორის: დევნილი - 6 (10,90%), ადგილობრივი - 47 (85,45%), უფასო სამედიცინო კვლევების არარსებობა ადგილზე, სოფლებში აწუხებს- 53 (25,80%), მათ შორის: დევნილი - 4 (7,54%), ადგილობრივი - 47(88,67%), რეპროდუქტიულ ჯანმრთელობაზე დაბალი ცნობიერება პრიორიტეტულია - 25 (11,52%) რესპონდენტისთვის, ყველა ადგილობრივი (100%). პრობლემა უფასო სამედიცინო სკრინინგ-პროგრამები გოგონებისა და ქალებისათვის - 37 (17,05%) ქალისთვის, მათ შორის: დევნილი - 3 (8,10%), ადგილობრივი - 31 (83,78%), იგპ და კონფლიქტით დაზარალებული ქალებისთვის მიზნობრივი ჯანდაცვის პროგრამების სიმცირე აღნიშნა - 12 (5,52%)-მა , მათ შორის: დევნილი - 4 (33,33%), ადგილობრივი - 8 (66,66%). **(დიაგრამა 8)**




თვისებრივი კვლევის მონაცემებიც ადასტურებს რაოდენობრივი კვლევით მიღებულ შედეგებს.

თ.ჯ., 27 წ., დევნილი, მრავალშვილიანი დედა: ორსულობისას მოვიწამლე და სასწრაფოთი წამიყვანეს საავადმყოფოში. ფული არ გადამიხდია. ჩემი სურვილით გამოვეწერე. გამაფრთხილეს, იქნებ გაგირთულდეს და შემობრუნდეთ. იმავე დღეს სასწრაფოთი შევედი ისევ იმ საავადმყოფოში. მაგრამ შეეშალათ და გამაფორმეს როგორც თავისით მისული. ამომიწერეს 110 ლარი.მატყუებდნენ: ეს ფასიანია, ეს - უფასოო... ექიმს მოვუყევი და მითხრა, არ გადაიხადო. წამოვედი იქიდან, დღემდე მირეკავენ, გადაიხადეთ. არ ვიხდი.

ე.ჭ., ქალი, მერიის წარმომადგენელი: მოქალაქეებს სჭირდებათ ოპერაციების თანადაფინანსება, ასევე დამატებითი სამედიცინო კვლევების ჩატარებაში მხარდაჭერა.

კვლევისთვის საინტერესო იყო, თუ როგორ ახერხებენ კვლევაში მონაწილე ქალები, ჯანმრთელობის გაუარესების დროს პრობლემის გადაჭრას. აღმოჩნდა, რომ 71 (32,71%) გამოკითხულს უფარავს საყოველთაო ჯანდაცვის პროგრამა, კერძო დაზღვევით სარგებლობს - 35 (16,12%), საზღვარგარეთ სამედიცინო მომსახურებას იღებს- 5 (2,30%), ექიმბაშს მიმართავს - 13-(5,99%), ხოლო, ყველაზე მეტი ქალი ეწევა თვითმკურნალობას - 84 (38,70%), მათ შორის: დევნილი - 12 (14,28%), ადგილობრივი - 67 (79,76%). (დიაგრამა 9)




ჯანდაცვის პრობლემებზე საუბარი აქტუალური აღმოჩნდა თვისებრივი კვლევის მონაწილისთვისაც: **ე.ჭ., ქალი, მერიის წარმომადგენელი:** სპეციფიკური პროგრამა გვაქვს: კოპლეარული იმპლანტით მხარდაჭერა. ამ აპარატის შექმნა დაკავშირებულია დიდ თანხებთან. ეს პროგრამა ნაკლებად ცნობილია,თუმცა თვითმმართველობას აქვს და სახეზეა მისი საჭიროებაც. არის შშმ პირთა მხარდაჭერის, ომის ვეტერანთა მხარდაჭერის პროგრამა. შესაძლოა, მომართვიანობის და სხვა საფუძვლების გამო, გაიზარდოს, ან შემცირდეს გამოყოფილი ფინანსები, თუმცა ისინი რეგულარულად არის ჩვენს ბიუჯეტში. გენდერული საჭიროებების კუთხით შეიძლება გამოვყოთ ძუძუს კიბოს მქონე პირთა დახმარების პროგრამა სპეციალური მედიკამენტის - ჰერცეპტინის შექმნის ნაწილში.

VI ბლოკი: პირადი უსაფრთხოება

რაოდენობრივ კვლევაში გამოიკვეთა ოჯახში ძალადობის პრობლემა და ქუთაისის მუნიციპალიტეტის მოსახლეობის ნაწილისთვის რამდენად აქტუალურია ეს საკითხი.როგორც კვლევამ აჩვენა, ძალადობის პრობლემას აქტუალურად თვლის - 81 (37,32%), მათ შორის: 9 დევნილი (11,11%), 67 ადგილობრივი (82,71%), 5 მარტოხელა დედა (6,17%), 1 სოციალურად დაუცველი (1,23%) და 10 უმუშევარი (12,34%). ძალიან აქტუალურად მიიჩნევს - 31 (14, 28%), მათ შორის: 5 დევნილი

(16,12%), 25 ადგილობრივი (80,64%) და 5 უმუშევარი (16,12%), არ მიაჩნია აქტუალურად - 65 (29,95%), ხოლო საერთოდ არ აქვს პასუხი - 40 (18, 43%) რესპონდენტს. (დიაგრამა 10)



პრობლემის მიმართ დამოკიდებულება გამჟღავნდა ფოკუს-ჯგუფების დროს:

ნ.დ., 53 წ., ქალი, დასაქმებული არასამთავრობო ორგანიზაციაში: მყავს ახლობელი ძალადობის მსხვერპლი. ვუთხარი, კარგია, რომ ოჯახი შეინარჩუნე-მეთქი. შვილები მეუბნებიან, მთელი ცხოვრება ასეთი ძალადობაში, უბედურებაში რატომ დაგვიმახინჯე ბავშვობაო. მყავდა მოსწავლე გოგონა, ბებიის მხრიდან განიცდიდა ძალადობას. ერთხელ ბავშვი გაცივდა. გოგონა აღმოჩნდა უპატრონოდ, ჩვენ ვართ დღის ცენტრი და ბევრ რამეს შევეჯახე ჯანმრთელობის სისტემასთან დაკავშირებით. რამდენჯერმე გამოვიძახეთ სასწრაფო, რომ ბავშვი გადაეყვანათ საავადმყოფოში. დიდ თანხას ითხოვდნენ - პედაგოგის ხელფასით ვერ გავწვდებოდი. მონაცემთა ბაზამ ამოაგდო, წინანდელი სოციალურად დაუცველის სტატუსი და არ უნდა გადაეხადა თანხა. ამ პრობლემის გადაწყვეტაში საკრებულოს თავმჯდომარის მოადგილე დამეხმარა.

ნ.დ., 35 წ., ქალი, დიასახლისი: საახლობლოში იყო ძალადობა და 112-მა ოპერატიულად იმუშავა. სწრაფად მოხდა სიტუაციის განეიტრალება.

ლ. ხ., 56 წ., ქალი, დასაქმებული: 15 წელია, ვთანამშრომლობ, ფონდ „სოხუმთან“. ადრე საუბარი ტაბუდადებული იყო. დღეს მეტი ინფორმირებულობაა. პრობლემის მოგვარებაში ჩართულია არაერთი სამსახური. ბევრიც კეთდება. ერთი მსხვერპლიც რომ გადავარჩინოთ, მნიშვნელოვანია.

ერთმა მონაწილემ საკუთარი ისტორიაც კი გაუმხილა შეკრებილებს.

თ.ჯ., 27წ., ქალი, დევნილი, მრავალშვილიანი დედა: ჩემთვის თემა ძალიან მტკივნეულია - დედა იყო მუდმივი მსხვერპლი. ჩემი ბავშვობა ვუყურებდი, როგორ ტიროდა დედა და ღამეებს ათენებდა. რამდენჯერ მითხოვია, ნათესავებისთვის გაემხილა, მაგრამ - არა. თვითონ შევეცადე, დედისთვის, ბიძისთვის მეთხოვა დახმარება, მათ თავი შეიკავეს. ისე გავმწარებულვარ ზოგჯერ, მიფიქრია, ვიყიდი თავვის წამალს და მოძალადეს ჩავუყრი-მეთქი. პატარა ვიყავი, სხვაგვარად ვერ ვიაზროვნე დედის ტრაგედიით შეძრულმა.


მონაწილეთა 116 (53,45%) ყველაზე გავრცელებულ ძალადობის ფორმად ფსიქოლოგიურ ძალადობას ასახელებს, შემდეგ მიიჩნევენ ფიზიკურს (ცემა, დამცირება ძალის გამოყენებით და ა.შ.) - 51 (23,50%), ეკონომიკური (ფულადი სახსრებით მანიპულირება, ფინანსური დამოკიდებულება ოჯახის ერთ წევრზე, ფულის წართმევა, ფულადი სახსრების განკარგვის აკრძალვა და ა.შ.) მიაჩნია - 40 (18,43%)-ს, სექსუალურს (გაუპატიურება, სექსუალური კავშირის დამალვა, ადევნება) აღნიშნავს - 10 (4,60%) რესპონდენტს.

თუ რამდენად არის მოსახლეობა ინფორმირებული მსხვერპლთა მხარდაჭერის სერვისებზე გამოიკვეთა პასუხებიდან - 68 (31,33%) ქალი აღნიშნავს, რომ ინფორმირებულია, 70 (32,26%) -მა არ იცის, მათ შორის 6 დევნილია (7,59%) და 69 ადგილობრივი (87, 73%), ხოლო 70 (32,26%) რესპონდენტს კი აქვს ინფორმაცია ზოგიერთ მათგანზე.

ამ შეკითხვას მოყვება ჩამონათვალი, რომელთა შესახებ ინფორმირების ხარისხი ასე ნაწილდება:

სამთავრობო და არასამთავრობო დონეზე არსებული კრიზისული ცენტრების შესახებ იცის - 21 (9,67%) -მა, სახელმწიფო და არასამთავრობო ორგანიზაციების ბაზაზე არსებული თავშესაფრების შესახებ - 10 (4,60%) -მა, სახელმწიფო იურიდიული სამსახურების შესახებ ინფორმირებულია - 13 (5,99%), ცხელი ხაზზე ინფორმაციას ფლობს - 101 (46,54%), არასამთავრობო ორგანიზაციები და მათი სერვისები - 24 (11,05%), მუნიციპალური სერვისები - 1 (0,46%), ძალადობის საკითხებზე მომუშავე არასამთავრობო ორგანიზაციები - 18 (8,29%).

კვლევის მონაწილეებმა აღნიშნეს, თუ რა წყაროებიდან იღებენ ძალადობის მსხვერპლთა ან პოტენციურ მსხვერპლთა დახმარების სერვისების შესახებ ინფორმაციას: ტელევიზია, რადიო - 68 (31,33%), სოციალური ქსელი - 124 (57,142%), შეხვედრები არასამთავრობო ორგანიზაციებთან - 13 (5,99%), შეხვედრები ცენტრალური ხელისუფლების წარმომადგენლებთან - 5 (2,30%), შეხვედრები ცენტრალური ხელისუფლების წარმომადგენლებთან - 1(0,46%), საინფორმაციო ფურცლები, განცხადებები საზოგადოებრივი თავშეყრის ადგილებში - 4 (1,84%). (**დიაგრამა 11**)



ნ.დ., 35 წ., ქალი, დიასახლისი: მე ვიცი, რა უნდა გავაკეთო, თუ იქნება ძალადობა. არ უნდა დაიჩაგროს არც ქალი, არც ბავშვი და არც არავინ...

ი.შ., კაცი, საკრებულოს წარმომადგენელი: მოქალაქეთა ინფორმირება ჩვენი ერთ-ერთ მთავარი პრიორიტეტია. საკრებულო იკვლევს მოქალაქეთა ინფორმირებულობის დონეს. 2020 წელს შეიქმნა გენდერული თანასწორობის საბჭოს Facebook გვერდი, რომ უფრო მეტად აქტიური იყოს გვერდი ცნობიერების ამაღლების თუ ძალადობის მსხვერპლთა დახმარების კუთხით. მოსახლეობისთვის ინფორმაციის მიღების წყაროა ტელევიზია და მედიასაშუალებები.

ფ.ხ, ქალი, ადგილობრივი ექსპერტი სოციალურ საკითხებში: ნებისმიერ მოქალაქეს შეუძლია მუნიციპალიტეტის ვებგვერდზე ნახოს პროგრამები, რომლებსაც ვახორციელებთ. მერიის სოციალურ სამსახურს აქვს ოფიციალური ფეისბუქგვერდი, სადაც ახალი პროგრამა, თავისი შესწორებებით, ცვლილებებით ქვეყნდება.

თუ რამდენად ხელმისაწვდომია არსებული სერვისები ქუთაისის მუნიციპალიტეტის მოსახლეობისთვის - ხელმისაწვდომია - 75 (34,56%) ადამიანისთვის, არასაკმარისად ხელმისაწვდომია 124 (57,14%) რესპონდენტისთვის და საერთოდ არ არის ხელმისაწვდომი 18 (8,29%) გამოკითხულისთვის.

თვისებრივი კვლევის დროსაც გამოვლინდა, რომ არსებული სერვისები ნაკლებადაა ხელმისაწვდომი.

შ.შ., 30 წ., ქალი, სოციალურად დაუცველი, მრავალშვილიანი დედა: მრავალშვილიანობის თანხა მეკუთვნის და არ მაძლევენ. უნდა იყო ქუთაისის მოქალაქე, აქ ჩაწერილიო. ქუთაისში

დარეგისტრირებას არ მიკეთებენ, რადგან ვარ სხვის ბინაში, ნაქირავებში. მარტო ვცხოვრობ, ბავშვებთან ერთად. ქმარმა მიგვატოვა.

ნ.დ. 53 წ., ქალი, დასაქმებული არასამთავრობო ორგანიზაციაში: ყოველთვის გვყავდა დღის ცენტრში ძალადობის მსხვერპლი მშობლები, ბავშვები. ხშირად დედაც მალავს და ბავშვიც. ბავშვს ეტყობა. ძალიან გვჭირდება ძალადობის წინააღმდეგ მომუშავე ორგანიზაციების მეტი ჩართულობა, პროგრამებით დახმარება.


რაოდენობრივი კვლევის მონაწილეების 17 (7,83%) თვლის, რომ **ადგილობრივი თვითმმართველობის მიერ ქალთა მიმართ ძალადობაზე რეაგირებისთვის დანერგილი პროგრამები** საკმარისია, თვლის- 17 (7,83%), არ მიაჩნია საკმარისად - 41 (18,89%)-ს, ნაწილობრივ საკმარისად თვლის - 64 (29,49%), არ ფლობს ინფორმაციას ადგილობრივი თვითმმართველობის აღნიშნული პროგრამების შესახებ - 67 (30,87%), ხოლო პროგრამების გამრავალფეროვნების აუცილებლობას და ძალადობის მსხვერპლის სპეციფიკურ საჭიროებაზე მორგებას მიიჩნევს - 28 (12,90%).

ე.ჭ., ქალი, მერიის წარმომადგენელი: ძალადობის მსხვერპლ ქალებს უჭირთ თავის დამკვიდრება, საყოფაცხოვრებო პირობები აქვთ შეზღუდული, უკეთესია, გვემუშავა მათი პრობლემების მოგვარებაზე. ერთჯერად დახმარებებზე არის უფრო მოთხოვნა. გრძელვადიანი შეიძლება იყო მათი უზრუნველყოფა საცხოვრებელი ფართებით, თუმცა მერიას არ შეუძლია ამ ტიპის საჭიროებების დაკმაყოფილება. სოციალური საცხოვრისი მალე ახალიც აშენდება.თუ იქნება მომართვიანობა, ჩვენ დავეხმარებით მათ, რომ განთავსდნენ საცხოვრისში.

ფ.ხ. ქალი, ადგილობრივი ექსპერტი სოციალურ საკითხებში: თუ მოსახლეობიდან გაჩნდება გარკვეული ტიპის ინიციატივები, რა შედეგი შეიძლება მოყვეს, რა იქნება მიზნობრივი მაჩვენებელი, შეფასების ინდიკატორი, ნებისმიერ ინიციატივას განვიხილავთ, წარვადგენთ საკრებულოში და ერთად მივიღებთ გადაწყვეტილებას.

VII ბლოკი: ეკოლოგიური უსაფრთხოება

თუ როგორია მათ ქალაქში/სოფელში არსებული სანიტარული სიტუაცია და სიტუაცია გარემოს დაცვის კუთხით, რაოდენობრივი კვლევის მონაწილეებმა შემდეგნაირად შეაფასეს: ძალიან ცუდად თვლის - 30 (13,82%), ცუდად მიაჩნია - 66 (30,41%), ნორმალურად აღნიშნა - 112 (51,61%), კარგი - 8 (3,68%) და ძალიან კარგი აღნიშნა მხოლოდ - 1 (0,46%) რესპონდენტმა.**(დიაგრამა 12)**



კ.კ., კაცი, ადგილობრივი ექსპერტი ინფრასტრუქტურის საკითხებში: არის ნაგვის ურნების სიმცირე. ნაგავავშობილი მანქანებიც არაა საკმარისი. ქალაქს სჭირდება 60-მდე ნაგავგადამამუშავებელი სატრანსპორტო საშუალება, დღეს 30 მანქანა გვყავს. წელს დაგეგმილია მანქანების შექმნა და 3-4 წელიწადში გვექნება მანქანების სრული რაოდენობა. პრობლემაა საზოგადოებრივი საპირფარეშოები. ჩვენ შარშან დავასრულეთ ცენტრალურ ბულვარში საპირფარეშოს მოწყობა. პრობლემაა მიუსაფარი

მაღლებიც. როცა უბანში აგრესიული ცხოველია, მერიის ცხელ ხაზზე რეკავენ და მორიგე ჯგუფი (მუშაობს 24 საათი) გადის ადგილზე. ინფორმაცია არის სოცქსელებში, მუნიციპალურ ორგანოშიც არის გამოკრული ცხელი ხაზის ნომრები.

თემში ყველაზე მნიშვნელოვან ეკოლოგიურ პრობლემად დასახელდა: დაბინძურებული ჰაერი - 100 (46,08%), სუფთა წყალთან არაჯეროვანი ხელმისაწვდომობა - 24 (9,67%), საკანალიზაციო სისტემების გაუმართაობა - 44 (20,27%), სანიაღვრე მიწების არ არსებობა ან გაუმართაობა - 49 (22,58%).

ფოკუს-ჯგუფების მონაწილეებმა კონკრეტულ ეკოლოგიურ პრობლემებზე ისაუბრეს:

ტ.გ., 62 წ., ქალი, დევნილი, დასაქმებული: დასახლებაში, თაბუკაშვილზე არის მეტალურგიული ქარხანა. საშინელი გამონაბოლქვი წამლავს ჰაერს. ძალიან აქტიურად ვიბრძვი ამ პრობლემის წინააღმდეგ. ფილტრები აქვთ, დამატებითი ხარჯია და ერიდებიან. ღამით უშვებენ გამონაბოლქვს.

ლ.ხ., 56 წ., ქალი, დასაქმებული: ავტოქარხნის დასახლებაში არის ოღასკურას არხი, რომელიც ნაგავსაყრელადაა ქცეული. როცა დიდდება, იტბორება ყველაფერი. ასევეა, მუსხელიშვილის ქუჩაზე, იტბორება სახლების პირველი სართულები. წლებია, ეს პრობლემა მოუგვარებელია.

VIII ბლოკი: ზოგადი კითხვები

თუ როგორია კომუნიკაცია მოსახლეობასა და ადგილობრივ თვითმმართველობას შორის, მიმართავენ თუ არა სხვადასხვა საკითხების მოსაგვარებლად, გამოჩნდა რაოდენობრივი კვლევებიდან - 61 (28,11%) გამოკითხული აღნიშნავს რომ მიუმართეს, არ მიუმართეს - 117 (53,91%), არ მიმართავენ, რადგან არ მჯერა, რომ მას შესაბამისი რეაგირება მოჰყვება - 39 (17,97%). (დიაგრამა 13)



თვისებრივი კვლევის მონაწილეების პასუხებიდან დაფიქსირებული პასუხები:

მ.ქ., ქალი, დასაქმებული: კანალიზაციის მილი გასკდება, თუ სხვა რამ მოხდება, ოპერატიულად მოდიან. ნიკეაზე შიდა ეზოს მოწესრიგება ვითხოვეთ, ჩაგვსვეს პროგრამაში თანადაფინანსებით, უკვე დასრულდა. ამ ეტაპზე მოპირკეთების სამუშაოები მიმდინარეობს. ოპერატიულობა და სწრაფი რეაგირებაა. დადებითი შედეგებიც სახეზეა.

ნ.ხ., 50 წ., ქალი, დასაქმებული: ჩემს თანამშრომელს დასჭირდა ოპერაცია. მერიაში დავეწერეთ განცხადება და მაშინვე იყო რეაგირება.

ტ.გ., 62 წ., ქალი, დევნილი, დასაქმებული: 2008 წელს მივმართე მუნიციპალიტეტს ბინის გადახურვაზე, რეაგირება იყო სწრაფი. 2010 წელს დედას ოპერაცია გავუკეთე, დამაფინანსეს.

ნ.ჩ., 45 წ., ქალი, დასაქმებული არასამთავრობო ორგანიზაციაში, შშმ პირი: ქუჩის განათება იყო გასაკეთებელი. უქიმერიონში ვცხოვრობ და შეტყობინებებზე რეაგირება არის სწრაფი. ონკოლოგიური პაციენტი ვარ, ერთი თეთრიც არ მიმიღია ხელისუფლებისგან, გარდა იმისა, რომ ჩემმა კლინიკამ ჩამსვა პროგრამაში და ქიმიიდან დაწყებული, ყველაფერი მიტარდებოდა უფასოდ.

მეგობარი მყავს, რომელსაც ეტლი გაუფუჭდა. განაცხადი შეიტანა და მოუვიდა პასუხი, რომ ერთი წელიწადი შეზღუდულია ეტლების გაცემა. 28 წლის გოგოა, მასაც უნდა გარეთ გამოსვლა...

ლ.ხ., 56 წ., ქალი, დასაქმებული: ოთხი წლის წინ ოპერაცია გავიკეთე, დახმარება გამიწია მერიამ. მეორე ეხება ჩემს კორპუსს, სადაც მუდმივად ხდება საკანალიზაციო მილების დაზიანება. რეაგირებენ სწრაფად და ოპერატიულად ხდება შეკეთება.

ა.წ., 44 წ., ქალი, დასაქმებული, მრავალშვილიანი დედა: იყო პროგრამა მრავალშვილიან ოჯახებთან დაკავშირებით სამეწარმეო კუთხით. გამოცხადდა კონკურსი, მივიღეთ მონაწილეობა და გაიმარჯვა ჩვენმა პროექტმა, დაგვაფინანსეს.

მ.ს., 60 წ. ქალი, შშმ პირი, მრავალშვილიანი დედა: მივედი საახალწლო საჩუქრისთვის, რომ ინვალიდი მარტოხელა დედისთვის, რომელსაც ინვალიდი შვილი ჰყავს, მიეცათ ერთი პაკეტი და არ მომცეს. ოჯახზე ერთია, და ვერ მიიღებთო. გამონაკლისი არაო - მერია არ გვამღვეს უფლებასო.

ფ.ხ., ქალი, ადგილობრივი ექსპერტი სოციალურ საკითხებში: სულ მცირე 15 ათასი ადამიანი მოგვმართავს, ჯანმრთელობის პრობლემებთან და დასაქმების კუთხით. არ ვამბობთ უარს მოქალაქეებთან შეხვედრაზე.

მ.ვ., 50 წ., ქალი, პენსიონერი: ბინის წარმომადგენელმა არაფრის ძალა არ მაქვსო. ერთხელ მერიას მივმართე ერთჯერადი დახმარების თხოვნით და არავითარი დახმარება არ მომცეს

ის., 30 წ., ქალი, მრავალშვილიანი დედა: მივმართე მუნიციპალიტეტს შეშისათვის. მეკუთვნოდა, როგორც სოციალურად დაუცველს და მრავალშვილიანს, მაგრამ არ მომცეს, წელს არ არისო.

ე. ქ., 40 წ., ქალი, სოციალურად დაუცველი, მრავალშვილიანი დედა: შარშან ერთჯერადი ფულადი დახმარებისთვის მივმართე მერიას, როგორც მრავალშვილიანმა და შშმ პირის დედამ. მაგრამ პასუხად მომივიდა უარი.

ნ.დ., 53 წ., ქალი, დასაქმებული: ჯერ არ მიგრძენია, რომ ვარ სახელმწიფოს შვილი. ვინაიდან არასამთავრობოს მივეკუთვნები, არასოდეს მიმიღია დახმარება. ჩვენ იმის ნახევარი ხელფასიც არ გვაქვს, რასაც საჯარო სკოლის მასწავლებლები იღებენ. ერთი თვის წინ გულზე მქონდა პრობლემა და მივაკითხე სამკურნალო დაწესებულებას. თერაპევტის მომსახურება გეკუთვნის უფასოდო.

კ.კ., კაცი, ადგილობრივი ექსპერტი ინფრასტრუქტურის საკითხებში: მომართვიანობა გვაქვს მოსახლეობიდან, ბინათმესაკუთრეთა ამხანაგობიდან, რომელიც მერიის პროგრამებით სარგებლობას ითხოვს. წერილობით ყოველდღიურად 20-დან 50-მდე მოთხოვნაა.

ე.ჭ., ქალი, მერიის წარმომადგენელი: მომართვიანობა დიდია. განცხადებათა განხილვისათვის სპეციალური კომისიების შეკრება საჭირო ხდება კვირაში ან ორ კვირაში ერთხელ მაინც. მოსახლეობა მოგვმართავს გადაუდებელი რეაგირების პროგრამით დახმარებაზე, მედიკამენტებით დახმარების ვაუჩერზე, უფასოდ სამგზავრო ტალონებზე. მათ იციან საბინაო პროგრამების შესახებ, სადარბაზოების მოწყობის, სარდაფების და ლიფტების კეთილმოწყობის მხარმდამჭერი პროგრამების შესახებ.

კვლევის მონაწილეების პასუხების ანალიზისას ჩანს, თუ რა ფორმები გამოუყენებიათ ადგილობრივ ხელისუფლებასთან კომუნიკაციისთვის : დასახლების/სოფლის კრებები გამოუყენებია - 47 (21,65%), საკრებულოს სხდომაზე დასწრება აღნიშნა- 21 (9,67%), მერის, მერიის სამსახურების ანგარიშების მოსმენა დააფიქსირა - 27 (12,44%), პეტიცია დაასახელა - 28 (12,90%), მერის მრჩეველთა საბჭო, გენდერული საბჭო, შშმ პირთა საბჭო - 5 (2,30%) -მა, სამოქალაქო ბიუჯეტირება - 4 (1,84%), კომუნიკაციის ელექტრონული ფორმა (ელფოსტით მიმოწერა, მუნიციპალიტეტის ვებგვერდზე არსებული წერილისთვის განკუთვნილი ფანჯარა) - 85 (39,17%) გამოკითხულმა.

ი.შ., კაცი, საკრებულოს წარმომადგენელი: მოქალაქეებთან ადგილობრივი თვითმმართველობა იყენებს საჯარო შეხვედრებს, საკრებულოს თითოეულ წევრს აქვს მიღების დღეები საკრებულოში, მუნიციპალურ ერთეულებში. კოვიდპანდემიისას გაიზარდა დისტანციური კომუნიკაცია. ნებისმიერ მოქალაქეს შეუძლია, დაესწროს საკრებულოს სხდომებს და დასვას კითხვა. საკრებულოს სხდომების ანონსები ქვეყნდება საკრებულოს ოფიციალურ Facebook გვერდზე, სხდომები პირდაპირ ეთერში მუქდება ტელეკომპანია „რიონის“ ეთერში და საკრებულოს გვერდზე Facebook live-ის მეშვეობით. ა/ო

და მედიის წარმომადგენლებს სხდომაზე განსახილველი საკითხები თანდართული განმარტებებით ეგზავნებათ ელექტრონული ფოსტის მეშვეობით.

ე.ჭ., ქალი, მერიის წარმომადგენელი: მოქალაქეებს შეუძლიათ დაწერონ განცხადებები, მერიის ადმინისტრაციული შენობაში და გამოაგზავნონ ფოსტაზე; ასევე, ტელეფონზე დარეკვით, სახლიდან გაუსვლელად საკითხის გარკვევა; შეუძლიათ მოგვეწერონ facebook-ზე, ვებგვერდზე. მერს აქვს მოქალაქეების მიღება ხუთშაბათობით, სადაც მერის მოადგილეებიც არიან. მერის სამსახურების უფროსებთანაც არის შესაძლებელი შეხვედრები და მერის ტერიტორიულ ორგანოებშიც. პროგრამები განთავსებულია ვებგვერდზე. ამ მხრივ ხანდაზმულებს აქვთ პრობლემა, თუმცა, მერიის შენობაში, მოქალაქეთა მისაღებ სივრცეში სტენდზეც არის ამის შესახებ ინფორმაცია. მათ შეუძლიათ სივრცის რეგისტრატორებთან განაგრძონ დეტალები. ტერიტორიულ ორგანოებს აქვთ ამომწურავი ინფორმაცია. ჩვენ გვაქვს მრავალშვილიანი ოჯახების და ახალგაზრდული ინიციატივების პროგრამა. ეს პროგრამები ნაკლებადაა ცნობილი. მათ გამოსაყენებლად მეტი ჩართულობაა საჭირო.

მ.ხ., კაცი, ადგილობრივი ექსპერტი ინფრასტრუქტურის საკითხებში: ყველა შესყიდვა ხორციელდება ელექტრონული ტენდერის საფუძველზე, რომელიც ხელმისაწვდომია ნებისმიერი დაინტერესებული პირისთვის.

კვლევისას შეფასდა, თუ რამდენად მორგებულია (ან ასახავენ) ადგილობრივი ხელისუფლების მიერ მიწოდებული მომსახურებები და პროგრამები მოწყვლადი მოსახლეობის სპეციფიკურ საჭიროებებს. გაირკვა, 110 (50,69%) თვლის, რომ არ არის დანერგილი მოწყვლადი მოსახლეობის სპეციფიკური საჭიროებების და პროგრამებით მათი კმაყოფილების შეფასების პრაქტიკა, 56 (25,80%) მიაჩნია, რომ პროგრამები არ ასახავენ ცალკეული მოწყვლადი ჯგუფების სპეციფიკურ საჭიროებებს, ხოლო 51 (23,50%) გამოთქვამს მოსაზრებას, რომ ადგილობრივი პროგრამები ითვალისწინებენ მოწყვლადი ჯგუფების სპეციფიკურ საჭიროებებს.

თვისებრივი კვლევის ანალიზისას გამოვლინდა: მ.ც., 65 წ., ქალი, შშმ პირი: მეტი ყურადღება სჭირდებათ მარტოხელებს, შშმ პირებს, პენსიონერებს, ბინაზე მათ სამედიცინო დახმარებას. პანდემიის მეორე ტალღის დროს, როცა ტემპერატურამ ამიწია, დავურეკე ოჯახის ექიმს და ვთხოვე, გამოეგზავნა ლაბორატორიიდან კოვიდ-19-ზე ტესტის ჩასატარებლად. მითხრა, ასეთი სერვისი არ გვაქვსო, როცა გაიგო, რომ ვიცოდი ამ სერვისის შესახებ, მითხრა, რამდენთანაც გავაგზავნე, არავისთან მისულანო. გამოდის, რომ ჩვენ, შშმ პირები სიკვდილისთვის ვართ განწირულნი. მოსახლეობის სპეციფიკური საჭიროებისათვის მნიშვნელოვანი სოციალური დახმარების პროგრამაა. პირადად ჩემთვის ამ პროგრამას არანაირი დადებითი გავლენა არ მოუხდენია, პირიქით, დამცირებულად ვიგრძენი თავი, როცა მე, მარტოხელასა და შშმ ადამიანს, რომელსაც გადაადგილება მიჭირს, იმიტომ არ მეკუთვნის თურმე სოციალური პროგრამით გათვალისწინებული დახმარება, რომ იატაკზე პარკეტია, თუმცა კი არ აგია, დევეს და საერთოდ, სრულადაა დაზიანებული.

მ.ვ., 50 წ., ქალი, პენსიონერი: ვხედავ პროგრამებს, ტელევიზორშიც ვუყურებ. ბინას ჰყავს წარმომადგენელი, მეუბნება, ძალა არ გაგვაჩნია, მუნიციპალიტეტს არა აქვს საშუალებაო.

შ.შ., 30 წ., ქალი, სოციალურად დაუცველი, მრავალშვილიანი: საახალწლოდ, სააღდგომოდ დახმარება იყო, რომ მივედი, ჩაწერილი არ ხარ ქუთაისში და არ გეკუთვნისო. ოთხი შვილი მყავს, მამისგან მიტოვებული. მარტოხელა დედა ვარ.

ა.წ., 44 წ., ქალი, დასაქმებული, მრავალშვილიანი დედა: 6 შვილის დედას სტატუსიც არ მქონდა, გასულ წელს მოგვანიჭეს, ესეც არაფერს ნიშნავს. დაცინვაა. სახელმწიფოდან ხდება მხოლოდ ელემენტარული ელექტროენერგიის სუფსიდირება. ჩვენი არჩევანია მრავალშვილიანობაც, მაგრამ ელემენტარული თანადგომაა საჭირო, საშემოსავლო მაინც იყოს ცოტა ნაკლები, ისევე ჩვენი გამომუშავებული თანხიდან.

ნ.დ., 35 წ., ქალი, დიასახლისი, მრავალშვილიანი დედა: 11 არასრულწლოვანი შვილი მყავს, მჭირდება ბავშვთა კვება, წამლები, პამპერსი, ბავშვთა მოვლის საშუალებები. კატასტროფული ფასი აქვს პედიატრიულ წამლებს. ტელევიზიით გადიოდა რეკლამა, მრავალშვილიანობა კარგიაო. კარგია, უბრალოდ, დაფასებაა საჭირო.

მ.ც., 65 წ., ქალი, შშმ პირი: ყველაზე პრიორიტეტული ეკონომიკური განვითარების პრობლემაა, რაც აისახება მოსახლეობაზე. ემიგრანტების უმრავლესობა ქალია. ქალის, დედის გარეშე დარჩენილ ოჯახებს რა ნეგატიური მომავალი აქვს, ეს ყველამ ვიცით.


ნ.ჩ., 45 წ., ქალი, დასაქმებული, შშმ პირი: ჩვენ გვქონდა რამდენიმე პროგრამა, ეს იყო შშმ პირებისთვის მუსიკალური და სხვადასხვა ინსტრუმენტზე დაკვრის შესწავლა, კომპიუტერის და უცხო ენის შემსწავლელი კურსების გახსნა. დაგვაფინანსა მერიამ, სამთვინი კურსები გავიარეთ და არ მინდა, ეს დავკარგო. დასაქმება არის ჩვენთვის მიუღწეველი საკითხი. სადაც გავაგზავნე სივი და ვთქვი, რომ მჭირდება დასაქმება, შემიძლია მეტყველება, აზროვნება, რომ ფეხით ვერ დავდივარ. შემიძლია ნებისმიერ ადგილზე მისვლა, თუ გარემო ადაპტირებულია. ვითხოვთ გამუდმებით, რომ ხელისუფლებამ შეგვიქმნას გადაადგილების საშუალება. შემოვიდა ახალი ავტობუსები, მაგრამ ავტობუსამდე მისვლა გინდა. იმხელა ბარდიურებია, გაჩერებამდე ვერ მიდიხარ. თუ ვინმე დავიხმარე და ჩემი საქმისთვის მოვაცდინე, მაშინ რა ადაპტირება ჰქვია ამას. ვიბრძვით, რომ ყურადღება მოგვაქციონ. ბევრი რამ შეგვიძლია, მაგრამ ხელის შეწყობა გვჭირდება.

მ.ქ., 67 წ., ქალი, დასაქმებული: მოსახლეობამ არ იცის, რა პროგრამებია, ხალხამდე არ მიდის ინფორმაცია. არა მგონია, ვინმე სწავლობდეს ქუთაისის მოსახლეობაში არსებულ პრობლემებს, რა მჭირდება, ან ოჯახს რა სჭირდება. ადგილობრივი ხელისუფლებისგან არც ანალიზი კეთდება.

ფ.ხ., ქალი, ადგილობრივი ექსპერტი სოციალურ საკითხებში: ჩვენი ბიუჯეტი მოწყვლად ჯგუფებზეა გათვლილი. შშმ ადამიანებზე - კერძოდ, აუტისტური სპექტრის მქონე ბავშვები, ფენილკეტონური დაავადების მქონე ბავშვები სპეციალური კვებისათვის მიემგზავრებიან თბილისში, რადგან სპეცკვების პროდუქტები ქუთაისში არ იყიდება. გაიზარდა ლეიკოზით და სოლიდური სიმსივნით დაავადებულ პირთა დახმარების პროგრამა 0-დან 18 წლამდე.

რაოდენობრივი კვლევის მონაწილეებმა გამოხატეს თავიანთი დამოკიდებულება თუ როგორ აისახება ადამიანური უსაფრთხოების გაზრდილი საფრთხე მოსახლეობის მდგომარეობაზე:

167 (76,95%) თვლის, რომ გაზრდილია სტრესი, დაძაბულობა, 93 (42,85%) მიჩნევს, რომ თავს იჩენს ჯანმრთელობასთან დაკავშირებული პრობლემები, 96 (44,23%) აფიქსირებს, რომ გამოკვეთილია უიმედობა, მომავლის შიში, 94 (43,31%) მიაჩნია, რომ იზრდება ფსიქოლოგიური პრობლემები, 37 (17,05%) თვლის, რომ იკვეთება საზოგადოების დეპოლარიზაცია და კონფლიქტები, 50 (23,04%) აღნიშნავს, რომ გახშირებულია ოჯახური კონფლიქტების, ქალზე ძალადობის შემთხვევები, 87 (37,32%)-სთვის იზრდება ქალთა მიგრაცია და გაყოფილი ოჯახების რიცხვი და 51 (23,50%)გამოკითხულისთვის მაღალია დაუცველობის შეგრძნება.(დიაგრამა 14)



რეკომენდაციები

კვლევის შედეგად მიღებული ინფორმაციის საფუძველზე შემუშავდა სარეკომენდაციო წინადადებები ადგილობრივი სამთავრობო თუ არასამთავრობო სტრუქტურებისთვის:

- ბენეფიციარების გამოკითხვით და გარკვეული კორექტივების შეტანა არსებული პროგრამების სარგებლიანობის შესწავლა
- ადგილობრივი თვითმმართველობის პროგრამების შესახებ ინფორმაციის მოსახლეობამდე მიტანა
- მუდმივი კომუნიკაცია და კონსულტაციები მოსახლეობასთან, განსაკუთრებით მოწყვლად ჯგუფებთან
- მოსახლეობის სხვადასხვა კატეგორიის საჭიროებების შესწავლა და მათზე მორგებული პროგრამების შემუშავება
- ქალთა ეკონომიკური საქმიანობისა და მცირე ბიზნესის ხელშემწყობი პროგრამების გააქტიურება
- ქალების პროფესიული გადამზადება, შემდგომი დასაქმება და საჭირო ინვენტარის შეძენა
- ახალგაზრდების გააქტიურება, ახალგაზრდული ინიციატივების მხარდაჭერა
- ტურისტული სექტორის რეაბილიტაცია
- მერის წარმომადგენლების, ადგილობრივი დეპუტატების და ბინის წარმომადგენლების საქმიანობის გააქტიურება მოსახლეობისთვის არსებული პროგრამების ინფორმირების მიზნით
- ინფრასტრუქტურის, სოციალური და ჯანდაცვითი პროგრამების, საბინაო ინფრასტრუქტურის გაუმჯობესება
- სამშობიაროში ინფორმაციის მიწოდება მუნიციპალური დახმარების შესახებ მესამე და შემდეგი შვილის შეძენისას
- შშმ პირებისთვის მობილური ჯგუფის გამოყოფა გადაადგილებაში დასახმარებლად
- სანიტარიული მდგომარეობის გაუმჯობესების ხელშეწყობა ქალაქში - ნაგვის ურნების და ნაგავში მანქანების რაოდენობის გაზრდა
- ზაფხულის პერიოდში და მითუმეტეს პანდემიის პირობებში ნაგვის ურნების დეზინფექცია სკვერებში წყლის ონკანების მოწესრიგება
- საპირფარეშოების განთავსება, მიუსაფარი ცხოველების გადაყვანა თავშესაფარში
- ეკოლოგიური პირობების გაუმჯობესებაზე ზრუნვა (რეკრიაციული ზონების გაზრდა, მარადმწვანე ხეების დარგვა, სკვერების მოწყობა, მეტალურგიული ქარხნის ეკოლოგიური საფრთხის განეიტრალება ფილტრების გამოყენებით, ოლასკურას არხის გაწმენდა)
- უნიკალური მონაცემების მქონე და ნიჭიერი ბავშვების მხარდაჭერის პროგრამის შემუშავება
- ძალადობის მსხვერპლთა მხარდაჭერის პროგრამის შექმნა
- მეტი ყურადღების მიქცევა მარტოხელა დედებს, მრავალშვილიან დედებს, შშმ პირებს, პენსიონერებს
- ყველა უბანში ბავშვებისა და ახალგაზრდებისთვის სპორტული და კულტურული დაწესებულებების (ცეკვის, ფანდურის შემსწავლელი წრეები) შექმნის ხელშეწყობა
- ქალებისა და ახალგაზრდების დასაქმების ხელშეწყობა